

Կազմված է 08.07.2017թ.

ՕՐԻՆԱԿ _____

ՀԱՍՏՏՎԱԾ Է

«ՀԱՅԱՍՏԱՆԻ ՇԱԽՄԱՍԻ ՖԵԴԵՐԱՑԻԱ» ՀԱՍՏԱՐԱԿԱԿԱՆ ԿԱԶՄԱԿԵՐՊՈՒԹՅԱՆ
2017թ. ՀՈՒԼԻՍԻ 8-Ի ԱՐՏԱՀԵՐԹ
ԿՈՆՖԵՐԱՆՍԻ ԿՈՂՄԻՑ

ԿԱԶՄԱԿԵՐՊՈՒԹՅԱՆ ՆԱԽԱԳԱՀ՝

ՍԵՐԺ ՍԱՐԳՍՅԱՆ

ԳՐԱՆՑՎԱԾ Է

ՀՀ ԱՐԴԱՐԱԴԱՏՈՒԹՅԱՆ
ՆԱԽԱՐԱՐՈՒԹՅԱՆ ԿՈԼԵԳԻԱՅԻ
17.06.1993թ. ԹԻՎ 28/2 ՈՐՈՇՄԱՄԲ
ՆՈՐ ԽՄԲԱԳՐՈՒԹՅԱՄԲ
ԿԱՆՈՆԱԴՐՈՒԹՅՈՒՆԸ
ԳՐԱՆՑՎԱԾ Է

ՀՀ ԻՐԱՎԱԲԱՆԱԿԱՆ ԱՆՁԱՆՑ ՊԵՏԱԿԱՆ
ՌԵԳԻՍՏՐԻ ԿԵՆՏՐՈՆԱԿԱՆ ՄԱՐՄՆԻ
ԿՈՂՄԻՑ 29.12.2006թ.

ԳՐԱՆՑՄԱՆ ՀԱՄԱՐ **211.171.04293**
ՎԿԱՅԱԿԱՆ **03Ա074488**

ՀԱՐԿ ՎՃԱՐՈՂԻ ՀԱՇՎԱՌՄԱՆ ՀԱՄԱՐ
0 1 5 1 5 0 3 3

29.12.2006թ. ԳՐԱՆՑՎԱԾ

ԿԱՆՈՆԱԴՐՈՒԹՅԱՆ ԹԻՎ 001-2
ՓՈՓՈԽՈՒԹՅՈՒՆԸ

ԳՐԱՆՑՎԱԾ Է

ՀՀ ԻՐԱՎԱԲԱՆԱԿԱՆ ԱՆՁԱՆՑ ՊԵՏԱԿԱՆ
ՌԵԳԻՍՏՐԻ ԳՈՐԾԱԿԱԼՈՒԹՅԱՆ ԿՈՂՄԻՑ

« _____ » _____

ԿԱՆՈՆԱԴՐՈՒԹՅՈՒՆ

«ՀԱՅԱՍՏԱՆԻ ՇԱԽՄԱՍԻ ՖԵԴԵՐԱՑԻԱ»
ՀԱՍՏԱՐԱԿԱԿԱՆ ԿԱԶՄԱԿԵՐՊՈՒԹՅԱՆ

(Նոր խմբագրություն)

1. ԸՆԴՀԱՆՈՒՐ ԴՐՈՒՅԹՆԵՐ

- 1.1. «Հայաստանի շախմատի ֆեդերացիա» հասարակական կազմակերպությունը (այսուհետ՝ Կազմակերպություն), Հայաստանի Հանրապետության քաղաքացիների, օտարերկրյա պետությունների քաղաքացիների, քաղաքացիություն չունեցող անձանց (այսուհետ՝ ֆիզիկական անձ) և (կամ) իրավաբանական անձանց հասարակական միավորում է, որն ունի ոչ առևտրային կազմակերպության կարգավիճակ:
- 1.2. Կազմակերպությունը գործում է ՀՀ օրենսդրության, ՀՀ միջազգային պայմանագրերի և սույն կանոնադրության հիման վրա:
- 1.3. Կազմակերպության գործունեության սկզբունքներն են օրինականությունը, խտրականության բացառումը, բարեխղճությունը, անդամների շահերի ընդհանրությունը, անդամության կամավորությունը, ինքնակառավարումը, հաշվետվողականությունը:
- 1.4. Կազմակերպությունը գործում է ՀՀ ողջ տարածքում և օտարերկրյա պետություններում՝ այդ պետությունների օրենսդրությանը համապատասխան:
- 1.5. Կազմակերպությունը չունի անդամության սահմանափակում:
- 1.6. Կազմակերպությունը գործում է առանց ժամկետի սահմանափակման (անժամկետ):
- 1.7. Կազմակերպության անվանումն է՝
Հայերեն՝ «Հայաստանի շախմատի ֆեդերացիա» հասարակական կազմակերպություն:
Ռուսերեն՝ Федерация шахмат Армении
Անգլերեն՝ Armenian Chess Federation
- 1.6. Կազմակերպության գտնվելու վայրն է՝ ՀՀ, ք. Երևան, Խանջյան փող., շ. 50:

2. ԿԱԶՄԱԿԵՐՊՈՒԹՅԱՆ ԳՈՐԾՈՒՆԵՈՒԹՅԱՆ ԱՌԱՐԿԱՆ ԵՎ ՆՊԱՏԱԿՆԵՐԸ

- 2.1. Կազմակերպության նպատակները և խնդիրներն են՝ օրենքով սահմանված կարգով՝
 - 2.1.1. Նպաստել շախմատային շարժման ծավալմանն ու զարգացմանը
 - 2.1.2. Կոորդինացնել Հայաստանի Հանրապետության շախմատային կազմակերպությունների աշխատանքը
 - 2.1.3. Որպես շախմատի միջազգային ֆեդերացիայի (ՖԻԴԵ) անդամ, ՖԻԴԵ-ում և միջազգային այլ կազմակերպություններում ներկայացնել հայկական շախմատի շահերը
- 2.2. Կազմակերպության գործունեության առարկան է՝ օրենքով սահմանված կարգով՝
 - 2.2.1. Մշակել շախմատային մրցումների համակարգ և կազմակերպել դրանց անցկացումը:
 - 2.2.2. Մշակել և հաստատել Հայաստանի Հանրապետության շախմատային կանոնագիրքը և միասնական մարզական դասակարգման նորմաներն ու պահանջները:
 - 2.2.3. Կազմակերպել միջազգային, հանրապետական և այլ բնույթի շախմատային մրցաշարերի անցկացում Հայաստանի Հանրապետության տարածքում:
 - 2.2.4. Ծավալել գովազդային գործունեություն:

- 2.2.5. Կազմավորել Հայաստանի շախմատի հավաքականները և կազմակերպել նրանց նախապատրաստությունը:
- 2.2.6. Կազմակերպել Հայաստանի շախմատիստների մասնակցությունը աշխարհի, Եվրոպայի առաջնությունների և միջազգային այլ մրցաշարերի:
- 2.2.7. Աջակցել տեղեկատվական տեխնոլոգիաների միջոցով շախմատային նոր ծրագրերի ստեղծմանը
- 2.2.8. Իրականացնել Հայաստանի շախմատի ֆեդերացիայի կանոնադրությամբ սահմանված նպատակներին համապատասխան ձեռնարկատիրական գործունեություն:
- 2.2.9. Կազմակերպել և տրամադրել օգնություններ:
- 2.2.10. Իրականացնել սույն կանոնադրությունից բխող և ՀՀ օրենսդրությամբ չարգելված այլ գործունեություն:

3. ԿԱԶՄԱԿԵՐՊՈՒԹՅԱՆ ԱՆԴԱՄԱԳՐՎԵԼՈՒ ԵՎ ԱՆԴԱՍՈՒԹՅՈՒՆԻՑ ԴՈՒՐՍ ԳԱԼՈՒ ԿԱՐԳԸ

- 3.1. Օրենքով սահմանված կարգով կազմակերպության անդամ կարող է դառնալ Հայաստանի Հանրապետության, ինչպես նաև օտարերկրյա ցանկացած քաղաքացի, քաղաքացիություն չունեցող անձ, ինչպես նաև Կազմակերպության անդամ դառնալու իրավունք ունեցող իրավաբանական անձ, որը ցանկանում է մասնակցել նրա գործունեությանը և ընդունում է կազմակերպության կանոնադրությունը:
- 3.2. Կազմակերպության հիմնադիրները Կազմակերպության պետական գրանցումից հետո օրենքի ուժով համարվում են Կազմակերպության անդամներ:
- 3.3. Կազմակերպության անդամ դառնալու ցանկություն ունեցող անձը գրավոր դիմում է Կազմակերպության Խորհրդին:
- 3.4. Կազմակերպության անդամ դառնալու ցանկություն ունեցող իրավաբանական անձը իր իրավասու մարմնի որոշումը և դիմումը ներկայացնում է Կազմակերպության Խորհրդին:
- 3.5. Մինչև տասնչորս տարեկան անձը Կազմակերպության անդամ կարող է դառնալ իր ցանկությամբ՝ օրինական ներկայացուցչի դիմումի հիման վրա:
- 3.6. Տասնչորսից մինչև տասնութ տարեկան անձը, եթե օրենքով սահմանված կարգով լրիվ գործունակ չի ճանաչված, Կազմակերպության անդամ կարող է դառնալ իր դիմումի հիման վրա՝ օրինական ներկայացուցչի գրավոր համաձայնությամբ:
- 3.7. Կազմակերպության անդամության մեջ ընդունելու հարցը լուծում է Կազմակերպության Խորհուրդը:
- 3.8. Անդամակցության դիմումը մերժելու դեպքում Խորհրդի կողմից դիմումատուին ուղարկվում է գրավոր պատճառաբանված մերժում:
- 3.9. Կազմակերպության անդամագրված անձը կարող է ցանկացած ժամանակ դուրս գալ Կազմակերպությունից՝ այդ մասին գրավոր դիմում (իրավաբանական անձի դեպքում՝ իրավասու մարմնի որոշում և դիմում) ներկայացնելով Կազմակերպության Խորհրդին:
- 3.10. Կազմակերպության անդամությունից զրկումը տեղի է ունենում Խորհրդի որոշմամբ:

3.11. Կազմակերպության այն անդամը, որը պարբերաբար խախտում է սույն կանոնադրության դրույթները կամ չի կատարում Կազմակերպության ղեկավար մարմինների պարտադիր կատարման ենթակա որոշումները՝ Խորհրդի որոշմամբ գրկվում է անդամությունից: Վերստին նրա անդամագրումը կատարվում է ընդհանուր հիմունքներով:

4. ԿԱԶՄԱԿԵՐՊՈՒԹՅԱՆ ԱՆԴԱՄՆԵՐԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ

4.1. Կազմակերպության ցանկացած անդամ իրավունք ունի՝

4.1.1. ընտրել և ընտրվել Կազմակերպության կառավարման մարմիններում:

4.1.2. ներկա լինել Կոնֆերանսին անձամբ, իսկ իրավաբանական անձի դեպքում՝ նաև լիազորված անձի միջոցով կամ Կազմակերպության Խորհրդի նիստերին:

4.1.3. Խորհրդի կողմից սահմանված կարգով, անվճար օգտվել Կազմակերպության ծառայություններից:

4.1.4. ծանոթանալ Կազմակերպության մարմինների արձանագրություններին, ստանալ նրանց ընդունած որոշումների պատճենները:

4.1.5. Կազմակերպության մարմինների որոշումները բողոքարկել Կոնֆերանսին: Կոնֆերանսի որոշումը, որն ընդունվել է օրենքի կամ Կազմակերպության կանոնադրության խախտմամբ կամ ոտնահարել է Կազմակերպության կամ նրա մասնակցի (անդամի) իրավունքներն ու օրինական շահերը, կարող է դատական կարգով անվավեր ճանաչվել Կազմակերպության կամ մասնակցի (անդամի) դիմումի հիման վրա: Դիմումը կարող է տրվել 60 օրվա ընթացքում՝ սկսած այն օրվանից, երբ Կազմակերպության անդամն իմացել է կամ պարտավոր էր իմանալ այդպիսի որոշման ընդունման մասին, եթե օրենքով այլ բան սահմանված չէ:

4.1.6. Կազմակերպությունից պահանջելու տեղեկություններ, ստանալու փաստաթղթերի պատճեններ՝ Կազմակերպության կանոնադրության փոփոխությունների, մարմինների արձանագրությունների, որոշումների, գույքի կառավարումից ստացված դրամական միջոցների վերաբերյալ, ինչպես նաև ստանալու նրա ֆինանսական հաշվետվությունների աուդիտն իրականացրած անկախ աուդիտորի եզրակացության պատճենը, որոնք վերաբերում են վերջին երեք տարիներին:

4.1.7. Կազմակերպության աշխատանքները բարելավելու նպատակով նրա ղեկավար մարմիններին ներկայացնել դիմումներ, առաջարկություններ և բողոքներ:

4.1.8. Ներկա գտնվել կազմակերպության Կոնֆերանսին, եթե վերջինս անցկացվում է կազմակերպության անդամների պատվիրակների կազմով, իսկ ինքը պատվիրակ չի ընտրվել:

4.1.9. Ծանոթանալ կազմակերպության մարմինների աշխատանքի արձանագրման մասին փաստաթղթերին, ստանալ նրանց ընդունած որոշումների պատճենները (պատճենների տրամադրման համար գանձվող վճարը չի կարող գերազանցել դրանց պատրաստման համար անհրաժեշտ ծախսերը):

- 4.1.10. Մպառիչ տեղեկատվություն ստանալ Կազմակերպության գործունեության մասին:
- 4.1.11. Ազատ դուրս գալ Կազմակերպությունից:
- 4.1.12. Մասնակցել Կազմակերպության կողմից կազմակերպված միջոցառումներին:
- 4.2. Կազմակերպության անդամը պարտավոր է՝
 - 4.2.1. Հոգ տանել կազմակերպության հեղինակության մասին:
 - 4.2.2. Կատարել Կազմակերպության կանոնադրության պահանջները, կառավարման մարմինների որոշումները:
 - 4.2.3. Բարեխղճորեն կատարել կառավարման մարմինների որոշմամբ իր վրա դրված պարտականությունները:
- 4.3. Կազմակերպության կանոնադրությունը խախտող կամ իր պարտականությունները չկատարող անդամի նկատմամբ Կազմակերպության Կոնֆերանսի կամ Խորհրդի կողմից կարող են կիրառվել կարգապահական տույժի միջոցներ՝ նկատողության, խիստ նկատողություն կամ Կազմակերպության անդամությունից զրկում:
- 4.4. Կազմակերպության անչափահաս անդամների իրավունքների և պարտականությունների առանձնահատկություններ չեն նախատեսվում: Կազմակերպության անչափահաս անդամներն ունեն սույն կանոնադրությամբ Կազմակերպության անդամի համար ամրագրված նույն իրավունքները, բացառությամբ ղեկավար և վերահսկողություն իրականացնող մարմիններում ընտրվելու իրավունքի, ինչպես նաև կրում են Կազմակերպության անդամի համար սույն կանոնադրությամբ ամրագրված պարտականությունները:

5. ԿԱԶՄԱԿԵՐՊՈՒԹՅԱՆ ԻՐԱՎՈՒՆՔՆԵՐԸ

- 5.1. Կազմակերպությունը հանդիսանում է իրավաբանական անձ՝ պետական գրանցման պահից:
- 5.2. Կազմակերպությունն ունի առանձնացված գույք, ինքնուրույն հաշվեկշիռ, իր անվանման հայերեն, ռուսերեն և անգլերեն լեզվով կլոր կնիք՝ խորհրդանիշով, կարող է ունենալ դրոշմ, հաշվարկային հաշիվ բանկում՝ Հայաստանի Հանրապետության և օտարերկրյա արժույթով: Կազմակերպությունն ունի խորհրդանիշ, որում պատկերված են շախմատի խաղաքարեր, իսկ ներքևի մասում գրված կազմակերպության անգլերեն անվանումը՝ Armenian Chess Federation (պատկերը կցվում է):
- 5.3. Կազմակերպությունը, իր կանոնադրությամբ նախատեսված նպատակներն իրականացնելու համար, օրենքով սահմանված կարգով իրավունք ունի՝
 - 5.3.1. իր անունից ձեռք բերել և իրականացնել գույքային և անձնական ոչ գույքային իրավունքներ, կրելու պարտականություններ, դատարանում հանդես գալ որպես հայցվոր կամ պատասխանող:
 - 5.3.2. բացել բանկային հաշիվներ Հայաստանի Հանրապետության և օտարերկրյա պետությունների բանկերում՝ Հայաստանի Հանրապետության դրամով և (կամ) արտարժույթով:
 - 5.3.3. ստեղծել այլ կազմակերպություն կամ լինելու նրա մասնակից:

- 5.3.4. ստեղծել առանձնացված ստորաբաժանումներ կամ հիմնարկներ:
- 5.3.5. տեղեկատվություն տարածել իր գործունեության մասին:
- 5.3.6. կազմակերպել և անցկացնել խաղաղ, առանց զենքի հավաքներ:
- 5.3.7. օրենքով սահմանված կարգով ներկայացնել ու պաշտպանել իր անդամների և կամավորների իրավունքներն ու օրինական շահերն այլ կազմակերպություններում, դատարանում, պետական կառավարման և տեղական ինքնակառավարման մարմիններում:
- 5.3.8. համագործակցել այլ կազմակերպությունների, այդ թվում՝ միջազգային կամ օտարերկրյա կազմակերպությունների հետ, ինչպես նաև համակարգված գործունեություն ծավալելու, ընդհանուր շահեր ներկայացնելու և պաշտպանելու նպատակով այդ կազմակերպությունների հետ ստեղծել Կազմակերպություն կամ անդամակցել նրանց ստեղծած Կազմակերպությանը՝ պահպանելով իր ինքնուրույնությունը և իրավաբանական անձի կարգավիճակը:
- 5.3.9. Կազմակերպությունն իրավունք ունի իր կանոնադրությամբ սահմանված նպատակներին համապատասխան իրականացնել ձեռնարկատիրական գործունեություն, այդ նպատակով տնօրինել իր գույքը և գործունեության արդյունքները, ինչպես նաև օրենքով սահմանված կարգով ստեղծել առևտրային կազմակերպություն կամ դառնալ նրա մասնակից:
- 5.3.10. կատարել օրենքով չարգելված այլ գործողություն:
- 5.4. Կազմակերպությունը կարող է իր նպատակներին համապատասխան՝ իր աշխատանքներում ներգրավել կամավորների: Կազմակերպության կողմից կամավորներ ներգրավելու իրավահարաբերությունների նկատմամբ կիրառվում են «Բարեգործության մասին» Հայաստանի Հանրապետության օրենքը և Հայաստանի Հանրապետության աշխատանքային օրենսգիրքը այնքանով, որքանով այդ կարգավորումները չեն հակասում սույն օրենքին: Եթե կամավորի աշխատանքի տևողությունը գերազանցում է շաբաթական 20 ժամը, ապա Կազմակերպությունը կամավորների հետ կնքում է կամավոր աշխատանքի մասին պայմանագիր:

6. ԿԱԶՄԱԿԵՐՊՈՒԹՅԱՆ ՊԱՐՏԱԿԱՆՈՒԹՅՈՒՆՆԵՐԸ ԵՎ ՊԱՏԱՄԽԱՆԱՏՎՈՒԹՅՈՒՆԸ

- 6.1. Կազմակերպությունը պարտավոր է՝
 - 6.1.1. Վարել իր անդամների և կամավորների հաշվառումը:
 - 6.1.2. Եթե Կազմակերպությունը հաշվետու տարվա ընթացքում հանրային միջոցներից ֆինանսավորվել է հինգ միլիոն և ավելի Հայաստանի Հանրապետության դրամի չափով, ապա օրենքով սահմանված կարգով պետական մարմիններ ներկայացված նրա տարեկան ֆինանսական հաշվետվությունները ոչ ուշ, քան հաջորդող տարվա մայիսի 15-ը հանրային միջոցներից ֆինանսավորման մասով ենթակա են պարտադիր աուդիտի՝ Կազմակերպության Կոնֆերանսի ընտրած անկախ աուդիտորի կողմից:
 - 6.1.3. Պաշտոնական կայքի առկայության դեպքում հասցեի վերաբերյալ ծանուցել ՀՀ իրավաբանական անձանց պետական ռեգիստրի գործակալությանը:

- 6.1.4. Օրենքի պահանջների կատարումը ստուգելու համար Հայաստանի Հանրապետության կառավարությանն առընթեր պետական եկամուտների կոմիտեի պատճառաբանված պահանջով ողջամիտ ժամկետում նրան տրամադրել իր կառավարման մարմինների որոշումների պատճենները կամ գործունեության մասին այլ փաստաթղթեր:
- 6.1.5. Կազմակերպության անդամի պահանջով ոչ ավելի, քան պահանջի ստացման օրվանից հետո՝ հինգ աշխատանքային օրվա ընթացքում, նրան հնարավորություն տալ ծանոթանալու Կազմակերպության կանոնադրությանը, հիմնադիր այլ փաստաթղթերի, Կոնֆերանսի որոշումներին կամ տրամադրել դիմողին թղթային կամ էլեկտրոնային եղանակով՝ պահանջի ստացման օրվանից հետո՝ հինգ աշխատանքային օրվա ընթացքում: Սույն կետում նշված տեղեկությունները, փաստաթղթերը տրամադրելու համար կարող է գանձվել վճար, որը չի կարող գերազանցել դրանք տրամադրելու համար կատարված ծախսերը:
- 6.1.6. Կազմակերպության կանոնադրության փոփոխությունների, ինչպես նաև վերակազմակերպման կամ լուծարման դեպքերում՝ օրենքով սահմանված կարգով դիմել ՀՀ իրավաբանական անձանց պետական ռեգիստրի գործակալություն:
- 6.1.7. Իր գործունեության և գույքի օգտագործման տարեկան հաշվետվությունները ներկայացնել Կազմակերպության Գործադիր մարմնի հաստատմանը՝ ապահովելով այդ հաշվետվությունների հրապարակայնությունը:
- 6.1.8. Եթե Կազմակերպության գույքի ստացման աղբյուր են հանդիսացել հանրային միջոցները (պետական կամ տեղական ինքնակառավարման մարմինների և այլ հանրային միջոցներ տնօրինող մարմնի կամ իրավաբանական անձի միջոցները), ապա Կազմակերպությունը պարտավոր է յուրաքանչյուր տարի՝ մինչև հաշվետու տարվան հաջորդող մայիսի 30-ը, Կազմակերպությունների կողմից հրապարակվող հաշվետվությունների համար նախատեսված կայքում հրապարակել օրենքով նախատեսված հաշվետվությունը:
- 6.1.9. Կատարել օրենքով սահմանված այլ պարտականություններ:
- 6.2. Կազմակերպության մարմինները նրա անունից հանդես գալիս պետք է գործեն բարեխղճորեն և ողջամտորեն՝ ի շահ Կազմակերպության:

7. ԿԱԶՄԱԿԵՐՊՈՒԹՅԱՆ ՍԵՓԱԿԱՆՈՒԹՅՈՒՆԸ

- 7.1. Կազմակերպության գույքի ձևավորման աղբյուրներ կարող են լինել՝
- 7.1.1. Կազմակերպության անդամների ներդրումները:
- 7.1.2. Կազմակերպության անդամների վճարումները (անդամավճարները):
- 7.1.3. Ձեռնարկատիրական գործունեությունից ստացված միջոցները (ձեռնարկատիրական գործունեություն իրականացնելու դեպքում):
- 7.1.4. Իր ստեղծած կամ իր մասնակցությամբ այլ կազմակերպությունից ստացված միջոցները:
- 7.1.5. Դրամական մուտքերը պետական բյուջեից:
- 7.1.6. Նվիրաբերությունները, այդ թվում՝ դրամաշնորհները:

7.1.7. Հանգանակությունները:

7.1.8. Օրենքով չարգելված այլ միջոցներ:

7.2. Կազմակերպության հիմնադիրների և անդամների՝ սեփականության իրավունքով կազմակերպությանը հանձնած, ինչպես նաև այլ աղբյուրներից ստացված գույքը Կազմակերպության սեփականությունն է:

7.3. Կազմակերպությունն իրեն պատկանող գույքը տիրապետում, օգտագործում և տնօրինում է իր կանոնադրությամբ սահմանված նպատակների իրականացման համար ու այդ նպատակներին համապատասխան՝ օրենքով և իր կանոնադրությամբ սահմանված կարգով:

7.4. Կազմակերպության հիմնադիրները և անդամները կազմակերպությանը որպես սեփականություն հանձնած գույքի (ներառյալ՝ անդամավճարները) նկատմամբ իրավունքներ չունեն: Նրանք պատասխանատու չեն կազմակերպության պարտավորությունների, իսկ կազմակերպությունը՝ իր հիմնադիրների և անդամների պարտավորությունների համար:

7.5. Կազմակերպության գույքը չի կարող բաշխվել նրա հիմնադիրների և անդամների միջև:

8. ԿԱԶՄԱԿԵՐՊՈՒԹՅԱՆ ԿԱՌՈՒՑՎԱԾՔԸ, ԿԱՌԱՎԱՐՈՒՄԸ ԵՎ ԲԱՐՁՐԱԳՈՒՅՆ ՄԱՐՄԻՆԸ

8.1. Կազմակերպության բարձրագույն ղեկավար մարմինը Կազմակերպության Կոնֆերանսն է:

8.2. Կազմակերպության կառավարման մարմինը Կազմակերպության Խորհուրդն է (այսուհետ՝ Խորհուրդ), որի նախագահն ի պաշտոնե Կազմակերպության նախագահն է:

8.3. Կազմակերպության Գործադիր մարմինը (Գործադիր մարմնի ղեկավարը) Կազմակերպության Նախագահն է:

8.4. Գործադիր մարմնից բացի առանց լիազորագրի Կազմակերպությունը ներկայացնող անձն է Գործադիր տնօրենը:

8.5. Կազմակերպության վերստուգող մարմինը Կազմակերպության Վերստուգիչ Հանձնաժողովն (Վերստուգողն) է:

Կազմակերպության Կոնֆերանսը

8.6. Կազմակերպության գործունեության և կառավարման ցանկացած հարցի վերջնական լուծման իրավունքը պատկանում է Կազմակերպության բարձրագույն մարմնին՝ Կոնֆերանսին:

8.7. Կոնֆերանսը հրավիրվում է հինգ տարին մեկ անգամ, մասնակիցների համատեղ հավաքի ձևով կամ հեռակա կարգով հեռահաղորդակցության միջոցների օգտագործմամբ՝ կազմելով համապատասխան արձանագրություն կամ փոխանակելով փաստաթղթեր, որոնք հնարավորություն են տալիս ձգգրիտ որոշել, որ փաստաթուղթը ելնում է նրանում որպես հեղինակ նշված անձից: Կոնֆերանսի օրակարգի, նրա

աշխատանքի ժամանակի և վայրի մասին մասնակիցները պետք է ծանուցվեն պատվիրված նամակով կամ Խորհրդի կողմից որոշված այլ եղանակով՝ ոչ ուշ, քան Կոնֆերանսի անցկացման օրվանից հինգ օր առաջ՝ հավաստելով հասցեատիրոջ կողմից ծանուցումը ստանալու փաստը:

- 8.8.** Եթե Կազմակերպության անդամների թվաքանակը անցնում է հարյուրի սահմանը, ապա Կոնֆերանսին կարող են մասնակցել անդամների կողմից Խորհրդի կողմից սահմանված համամասնությամբ ընտրված ներկայացուցչական պատվիրակները: Պատվիրակների թվաքանակը սահմանվում է Խորհրդի կողմից:
- 8.9.** Կազմակերպության արտահերթ Կոնֆերանս հրավիրում է Կազմակերպության անդամների առնվազն մեկ երրորդի, Նախագահի, Գործադիր տնօրենի կամ Կազմակերպության Վերստուգիչ հանձնաժողովի (Վերստուգողի) նախաձեռնությամբ Խորհրդի կողմից՝ պահանջող կողմի հաստատած օրակարգով, նախաձեռնությունից ոչ ուշ, քան հինգ օրվա ընթացքում հերթական Կոնֆերանս հրավիրելու համար սույն կանոնադրությամբ սահմանված կարգով: Արտահերթ Կոնֆերանս գումարելու ժամանակի և վայրի մասին Կոնֆերանսի մասնակիցները ծանուցվում են ոչ ուշ, քան արտահերթ Կոնֆերանս անցկացնելու օրվանից հինգ օր առաջ:
- 8.10.** Կազմակերպության Կոնֆերանսն ունի Կազմակերպության գործունեությանն առնչվող ցանկացած հարցի վերջնական լուծման վերաբերյալ որոշում կայացնելու իրավունք:
- 8.11.** Կոնֆերանսի բացառիկ իրավասության հարցերն են՝
 - 8.11.1.** կատարել Կազմակերպության կանոնադրությունում փոփոխություններ կամ լրացումներ կամ նոր խմբագրությամբ հաստատել կանոնադրությունը:
 - 8.11.2.** ստեղծել այլ իրավաբանական անձ, որոշումներ ընդունել այլ կազմակերպությունում Կազմակերպության մասնակցության մասին:
 - 8.11.3.** հաստատել Կազմակերպության կառուցվածքը:
 - 8.11.4.** որոշումներ ընդունել Կազմակերպության խորհրդի, Նախագահի, Վերստուգիչ հանձնաժողովի (Վերստուգողի), Նախագահի տեղակալների, Գործադիր տնօրենի, գլխավոր քարտուղարի ընտրության կամ նրանց լիազորությունները վաղաժամկետ դադարեցնելու (զբաղեցրած պաշտոնից ազատելու) մասին:
 - 8.11.5.** սահմանել կազմակերպության Գործադիր մարմնի վարձատրության կարգը և պայմանները:
 - 8.11.6.** ընտրել Կազմակերպության աուդիտն իրականացնող անձին (աուդիտորին), եթե Կազմակերպությունը հաշվետու տարվա ընթացքում հանրային միջոցներից ֆինանսավորվել է հինգ միլիոն և ավելի Հայաստանի Հանրապետության դրամի չափով, ապա օրենքով սահմանված կարգով պետական մարմիններ ներկայացված նրա տարեկան ֆինանսական հաշվետվությունները ոչ ուշ, քան հաջորդող տարվա մայիսի 15-ը հանրային միջոցներից ֆինանսավորման մասով ենթակա է պարտադիր աուդիտի:
 - 8.11.7.** հաստատելու Կազմակերպության ռազմավարությունը:
 - 8.11.8.** առնվազն հինգ տարին մեկ հաստատելու Գործադիր մարմնի կողմից Կոնֆերանսի գումարմանը նախորդող տարիների ընթացքում հաստատված Կազմակերպության գործունեության և գույքի օգտագործման տարեկան հաշվետվությունները,

Կազմակերպության հաշվապահական հաշվառման և Կազմակերպության կառավարման և այլ մարմինների կողմից ներկայացված հաշվետվությունները: Կազմակերպության գործունեության և գույքի օգտագործման տարեկան հաշվետվությունները Կոնֆերանսի հաստատմանն են ներկայացվում Վերստուգիչ հանձնաժողովի (Վերստուգողի) եզրակացության հետ միասին:

- 8.11.9.** դադարեցնել Կազմակերպության մարմինների իրավական ակտերի պահանջներին և կանոնադրությանը հակասող որոշումների գործողությունը:
- 8.11.10.** ընդունելու որոշում Կազմակերպության վերակազմակերպման մասին:
- 8.11.11.** ընդունելու որոշում Կազմակերպությունը լուծարելու մասին, բացառությամբ դատարանի վճռով լուծարվելու դեպքերի:
- 8.11.12.** իրականացնելու օրենքով կամ Կազմակերպության կանոնադրությամբ նախատեսված այլ լիազորություններ:
- 8.12.** Կոնֆերանսը անցկացվում է սույն կանոնադրությամբ սահմանված կարգով:
- 8.12.1.** Մինչև Կոնֆերանսի բացումը կատարվում է անդամների կամ նրանց պատվիրակների գրանցում: Գրանցումը կազմակերպում է Կոնֆերանսի նախագահը:
- 8.12.2.** Կոնֆերանսը բացվում է ծանուցման մեջ նշված ժամին կամ այդ պահին գրանցված անդամների ձայների մեծամասնությամբ ընդունված որոշմամբ՝ ավելի ուշ:
- 8.12.3.** Կոնֆերանսը որոշումներ է ընդունում՝ կազմակերպության բոլոր անդամների կամ բոլոր պատվիրակների ձայների պարզ մեծամասնությամբ, եթե մասնակցել են Կազմակերպության բոլոր անդամների կամ բոլոր պատվիրակների կեսից ավելին:
- 8.12.4.** Կոնֆերանսի որոշումներն ընդունվում են անդամների կամ նրանց պատվիրակների/ներկայացուցիչների բաց կամ փակ (գաղտնի) քվեարկությամբ: Քվեարկության ընթացքում յուրաքանչյուր անդամ կամ նրա ներկայացուցիչ ունի 1 ձայնի իրավունք: Կոնֆերանսը որոշումներ է ընդունում, եթե Կոնֆերանսին մասնակցում են կազմակերպության բոլոր անդամների կամ ընտրված բոլոր պատվիրակների կեսից ավելին:
- 8.12.5.** Եթե Կոնֆերանսում քննարկվում է Կոնֆերանսի որևէ մասնակցի կամ նրա հետ փոխկապակցված անձի (ծնող, ամուսին, զավակ, եղբայր, քույր, ամուսնու ծնող, զավակ, եղբայր և քույր) գույքային կամ այլ շահերի վերաբերյալ հարց, ապա Կոնֆերանսի տվյալ մասնակիցը քվեարկությանը չի մասնակցում:
- 8.12.6.** Օրակարգում ընդգրկված հարցերի քննարկման համար իրականացվող քվեարկության կարգը սահմանում է Կոնֆերանսը:
- 8.12.7.** Կոնֆերանսի ընդունած որոշումները գրանցվում են արձանագրության տեսքով, որը վարում է Կոնֆերանսի կողմից ընտրված քարտուղարը:

Կազմակերպության Խորհուրդը

- 8.13.** Խորհուրդն ընտրվում է Կոնֆերանսի կողմից հինգ տարի ժամկետով:
- 8.14.** Խորհուրդն իր աշխատանքներն իրականացնում է նիստերի ձևով, որոնք հրավիրվում են Կազմակերպության նախագահի կողմից ոչ ուշ, քան վեց ամիսը մեկ անգամ: Խորհրդի նիստ կարող է հրավիրվել նաև Կազմակերպության անդամների 20%-ի,

Խորհրդի տասնմեկ անդամների կամ Կազմակերպության Վերստուգիչ հանձնաժողովի (Վերստուգողի) պահանջով:

8.15. Խորհուրդը՝

8.15.1. Առաջարկություններ է ներկայացնում Կոնֆերանսին՝ նրա բացառիկ իրավասությանը վերաբերող հարցերի վերաբերյալ:

8.15.2. Ընդունում է Կազմակերպության անդամ և ազատում կամ զրկում անդամությունից:

8.15.3. Կազմակերպության անդամների նկատմամբ կիրառում են խրախուսանքներ և տույժի միջոցներ:

8.15.4. Ղեկավարում է Կազմակերպության գործունեությունը՝ Կոնֆերանսների միջև ընկած ժամանակաշրջանում:

8.15.5. Սահմանում է Կազմակերպության անդամների կողմից մուտքի վճարի և անդամավճարի մուծման կարգը, չափերը և ձևերը, որոնք հաստատվում են Կոնֆերանսի կողմից:

8.15.6. Որոշումներ է ընդունում Կազմակերպության առանձնացված ստորաբաժանումներ կամ հիմնարկներ ստեղծելու և դրանց կանոնադրությունները հաստատելու մասին:

8.15.7. Որոշումներ է ընդունում Կազմակերպության անդամների կողմից Կազմակերպության ծառայություններից անվճար օգտվելու մասին:

8.15.8. Խորհուրդը կարող է հարցեր քննարկել և որոշումներ կայացնել, եթե նրան մասնակցում են իր անդամների կեսից ավելին:

8.15.9. Խորհրդի որոշումներն ընդունվում են խորհրդի ձայների պարզ մեծամասնությամբ: Ձայների հավասարության դեպքում նախագահի ձայնը վճռորոշ է:

8.15.10. Իրականացնում է օրենքով և կանոնադրությամբ նախատեսված այլ անհրաժեշտ գործողություններ:

Կազմակերպության նախագահը

8.16. Կազմակերպության նախագահը, որն ի պաշտոնե խորհրդի նախագահն է, ընտրվում է Կոնֆերանսի կողմից՝ հինգ տարի ժամկետով: Կազմակերպության նախագահը հանդիսանում է Կազմակերպության Գործադիր մարմինը:

8.17. Նախագահի իրավասությունները ներառում են Կազմակերպության ընթացիկ գործունեության կառավարման, ինչպես նաև Կազմակերպության կառավարման մարմինների գործունեությունն ապահովելուն ուղղված բոլոր հարցերը:

8.18. Կազմակերպության նախագահը՝

8.18.1. Ապահովում է Կոնֆերանսի կամ Կազմակերպության կոլեգիալ կառավարման այլ մարմինների որոշումների կատարումը:

8.18.2. Ներկայացնում է Կազմակերպությունը Հայաստանի Հանրապետությունում և օտարերկրյա պետություններում:

8.18.3. Առանց լիազորագրի գործում է Կազմակերպության անունից, տալիս է լիազորագրեր:

8.18.4. Բանկերում բացում է Կազմակերպության հաշվարկային (այդ թվում՝ արտարժույթային) և այլ հաշիվներ:

- 8.18.5.** Իր իրավասության սահմաններում արձակում է հրամաններ, հրահանգներ, կատարման համար տալիս է պարտադիր ցուցումներ և վերահսկում դրանց կատարումը:
- 8.18.6.** Հաստատում է Կազմակերպության հաստիքացուցակը և տարեկան ծախսերի նախահաշիվը:
- 8.18.7.** Հաստատում է Կազմակերպության գործունեության և գույքի օգտագործման տարեկան հաշվետվությունները, հաշվապահական հաշվառման հաշվետվությունները, Կազմակերպության, ինչպես նաև նրա մարմինների հաշվետվությունները, որոնք առնվազն հինգ տարին մեկ անգամ, Վերստուգիչ հանձնաժողովի (Վերստուգողի) եզրակացության հետ միասին, ներկայացնում է Կոնֆերանսի հաստատմանը:
- 8.18.8.** Տնօրինում և կառավարում է Կազմակերպության ցանկացած չափի և տեսակի գույքը, այդ թվում՝ ֆինանսական միջոցները, գործարքներ է կնքում Կազմակերպության անունից:
- 8.18.9.** Հաստատում է Կազմակերպության գործունեությունը կանոնակարգող ներքին փաստաթղթերը, այդ թվում՝ նրա առանձնացված ստորաբաժանումների, հիմնարկների ներքին կարգապահական և այլ կանոնները:
- 8.19.** ՀՀ հավաքական թիմերի մարզիչների առաջարկությունների հիման վրա հաստատում է Հայաստանի հավաքական թիմերի ձևավորման կարգը և ձևավորում է թիմերի կազմերը:
- 8.19.1.** Կազմակերպության նախագահը որոշումներ է կայացնում միանձնյա:
- 8.20.** Կազմակերպության նախագահը կրում է օրենքով նախատեսված պատասխանատվություն օրենքների, իրավական այլ ակտերի, Կազմակերպության կանոնադրության, Կոնֆերանսի որոշումների կամ կնքված պայմանագրերի պահանջները չկատարելու կամ ոչ պատշաճ կատարելու համար:
- 8.21.** Կազմակերպության նախագահի առաջին տեղակալն ընտրվում է Կոնֆերանսի կողմից հինգ տարի ժամկետով:
- 8.22.** Նախագահի առաջին տեղակալը նախագահի բացակայության դեպքում փոխարինում է նախագահին:
- 8.23.** Հաստատում է ՀՀՖ մրցաշարերի օրացուցային պլանը:
- 8.24.** Համակարգում է շախմատի զարգացման մասսայական աշխատանքները:
- 8.25.** Համակարգում է ակումբների հետ տարվող աշխատանքները:
- 8.26.** Համակարգում է մարզչական խորհրդի աշխատանքները:
- 8.27.** Կազմակերպության նախագահի տեղակալներն ընտրվում են Կոնֆերանսի կողմից հինգ տարի ժամկետով:
- 8.28.** Նախագահի տեղակալները համակարգում են մրցավարական, որակավորման, շախմատային կոմպոզիցիայի, վետերանների և վարկանիշային հանձնաժողովների աշխատանքները:

Կազմակերպության Վերստուգիչ Հանձնաժողովը (Վերստուգողը)

- 8.29.** Կազմակերպության Վերստուգիչ հանձնաժողովը (Վերստուգողը) ընտրվում է Կոնֆերանսի կողմից հինգ տարի ժամկետով: Խորհրդի անդամները, Նախագահի տեղակալները, Գործադիր տնօրենը, Գլխավոր քարտուղարը և Կազմակերպության նախագահը չեն կարող լինել Վերստուգիչ հանձնաժողովի անդամներ (Վերստուգող):
- 8.30.** Վերստուգիչ հանձնաժողովն (Վերստուգողը) իր աշխատանքներն իրականացնում է նիստերի ձևով, որոնք հրավիրվում են տարեկան առնվազն 2 անգամ: Նիստ կարող է հրավիրվել նաև Կազմակերպության անդամների 20%-ի, Վերստուգիչ հանձնաժողովի անդամների մեկ երրորդի (Վերստուգողի), Կազմակերպության նախագահի կամ Խորհրդի պահանջով:
- 8.31.** Կազմակերպության Վերստուգիչ հանձնաժողովը (Վերստուգողը) կարող է հարցեր քննարկել և որոշումներ կայացնել, եթե նիստին մասնակցում են հանձնաժողովի անդամների 2/3-ը: Հանձնաժողովի որոշումներն ընդունվում են ձայների պարզ մեծամասնությամբ:
- 8.32.** Ձայների հավասարության դեպքում հանձնաժողովի նախագահի ձայնը վճռորոշ է: Եթե վերահսկող մարմինը Վերստուգողն է, ապա նա որոշումներ է ընդունում միանձնյա:
- 8.33.** Կազմակերպության գործունեության և գույքի օգտագործման վերաբերյալ հաշվետվությունները Կոնֆերանսի հաստատմանն են ներկայացվում դրանց վերաբերյալ Վերստուգող մարմնի եզրակացության հետ միասին:
- 8.34.** Վերստուգիչ հանձնաժողովը (Վերստուգողը) իրավասու է՝
- 8.34.1.** Տարին մեկ անցկացնելու Կազմակերպության ֆինանսատնտեսական գործունեության ստուգում:
- 8.34.2.** Ծանոթանալ Կազմակերպության գործունեությանն առնչվող բոլոր փաստաթղթերին և պարտադիր քննարկման ենթակա առաջարկություններ ներկայացնելու Կազմակերպության մարմիններին, որոնք պարտավոր են տաս աշխատանքային օրվա ընթացքում ներկայացնել գրավոր պատասխաններ:
- 8.34.3.** Պահանջել և ստանալ Կազմակերպության գործունեության վերաբերյալ տեղեկություններ:
- 8.34.4.** Իրականացնել Կազմակերպության կանոնադրությամբ կամ Կոնֆերանսի որոշմամբ նախատեսված այլ լիազորություններ:

ԿԱԶՄԱԿԵՐՊՈՒԹՅԱՆ ԳՈՐԾԱԴԻՐ ՏՆՕՐԵՆԸ

- 8.34.5.** Կազմակերպության Գործադիր տնօրենը Կազմակերպության Նախագահից բացի Կազմակերպությունն առանց լիազորագրի ներկայացնող անձն է:
- 8.35.** Գործադիր մարմնի իրավասությունները ներառում են Կազմակերպության ընթացիկ գործունեության կառավարման, ինչպես նաև Կազմակերպության կառավարման մարմինների գործունեությունն ապահովելուն ուղղված հետևյալ հարցերը:
- 8.35.1.** Բանկերում բացում է Կազմակերպության հաշվարկային (այդ թվում՝ արտարժութային) և այլ հաշիվներ:

- 8.35.2. Հաստատում է Կազմակերպության հաստիքացուցակը և տարեկան ծախսերի նախահաշիվը:
- 8.35.3. Հաստատում է Կազմակերպության գործունեությունը կանոնակարգող ներքին փաստաթղթերը, այդ թվում՝ նրա առանձնացված ստորաբաժանումների, հիմնարկների ներքին կարգապահական և այլ կանոնները:
- 8.35.4. Տնօրինում և կառավարում է Կազմակերպության ցանկացած չափի և տեսակի գույքը, այդ թվում՝ ֆինանսական միջոցները, գործարքներ է կնքում Կազմակերպության անունից:
- 8.35.5. Օրենքով սահմանված կարգով կնքում է գործարքներ, ստորագրում է պայմանագրեր, ֆինանսական փաստաթղթեր, բացում բանկային հաշիվներ:
- 8.35.6. Կազմակերպության անդամներին նշանակում է վարձավճարներ, նպաստներ և ֆինանսական օգնություն:
- 8.35.7. Իր լիազորությունների սահմաններում արձակում է հրամաններ:

ԿԱԶՄԱԿԵՐՊՈՒԹՅԱՆ ԳԼԽԱՎՈՐ ՔԱՐՏՈՒՂԱՐԸ

- 8.36. Կազմակերպության գլխավոր քարտուղարը ընտրվում է Կոնֆերանսի կողմից հինգ տարի ժամկետով:
- 8.36.1. Նախապատրաստում է խորհրդի և կոնֆերանսի քննարկման դրված հարցերը
- 8.36.2. ապահովում է Կազմակերպության գործավարությունը
- 8.36.3. Իրականացնում է Կազմակերպության համագործակցությունը Շախմատի միջազգային ֆեդերացիայի (ՖԻԴԵ) և այլ կազմակերպությունների հետ:
- 8.36.4. Իրականացնում է Կազմակերպության համագործակցությունը լրատվամիջոցների հետ:

9. ԿԱԶՄԱԿԵՐՊՈՒԹՅԱՆ ՎԵՐԱԿԱԶՄԱԿԵՐՊՈՒՄԸ, ԿԱՍԵՑՈՒՄԸ, ԼՈՒԾԱՐՈՒՄԸ, ԼՈՒԾԱՐՄԱՆ ԴԵՊՔՈՒՄ ԳՈՒՅՔԻ ՕԳՏԱԳՈՐԾՈՒՄԸ

- 9.1. Կազմակերպության վերակազմակերպումը (միաձուլում, միացում, բաժանում, առանձնացում, վերակազմավորում) կատարվում է նրա բարձրագույն մարմնի որոշմամբ: Կազմակերպության վերակազմակերպումը դատական կարգով հնարավոր է միայն օրենքով նախատեսված դեպքերում և կարգով:
- 9.2. Կազմակերպությունը կարող է միաձուլվել այլ կազմակերպության (կազմակերպությունների) հետ:
- 9.3. Կազմակերպությունը կարող է միանալ այլ կազմակերպության:
- 9.4. Կազմակերպությանը կարող է (են) միանալ այլ կազմակերպություն (կազմակերպություններ):
- 9.5. Կազմակերպությունը կարող է բաժանվել այլ կազմակերպությունների:

- 9.6. Կազմակերպությունից կարող է (են) առանձնանալ կազմակերպություն (կազմակերպություններ):
- 9.7. Կազմակերպությունը կարող է վերակազմավորվել հասարակական միավորման որևէ այլ կազմակերպական-իրավական տեսակի կամ հիմնադրամի:
- 9.8. Կազմակերպության (կազմակերպությունների) վերակազմակերպման հետևանքով նրանց կանոնադրությունների փոփոխությունները և (կամ) լրացումները կամ գործունեության դադարումը, ինչպես նաև նոր ստեղծված իրավաբանական անձինք պետական գրանցում են ստանում օրենքով սահմանված կարգով:
- 9.9. Կազմակերպության գործունեությունը կարող է որոշակի ժամկետով կասեցվել դատարանի որոշմամբ՝ Լիազոր մարմնի դիմումի հիման վրա՝ օրենքով սահմանված կարգով:
- 9.10. Կազմակերպության լուծարումը հանգեցնում է նրա գործունեության դադարմանը՝ առանց իրավունքները և պարտականություններն իրավահաջորդության կարգով այլ անձանց փոխանցվելու: Կազմակերպությունը համարվում է լուծարված, իսկ նրա գործունեությունը՝ դադարած, նրա գործունեության դադարման պետական գրանցման պահից:
- 9.11. Կազմակերպությունը կարող է կամավոր լուծարվել իր բարձրագույն մարմնի որոշմամբ՝ ներառյալ այն ժամկետը լրանալու կապակցությամբ, որով ստեղծվել է Կազմակերպությունը, կամ այն նպատակին հասնելու կապակցությամբ, որի համար նա ստեղծվել է:
- 9.12. Կազմակերպության հարկադիր լուծարման մասին որոշում կարող է ընդունել միայն դատարանը՝ պետական լիազորված մարմնի պահանջով և միայն օրենքով սահմանված հիմքերի առկայության դեպքում:
- 9.13. Կազմակերպության լուծարումն իրականացվում է իրավաբանական անձանց լուծարման՝ օրենքով սահմանված կարգով և պայմաններով:
- 9.14. Կազմակերպությունը լուծարվելու դեպքում պարտատերերի պահանջները բավարարելուց հետո մնացած գույքն ուղղվում է Կազմակերպության կանոնադրությամբ նախատեսված նպատակներին, իսկ դրա անհնարինության դեպքում փոխանցվում է պետական բյուջե:
- 9.15. Կազմակերպության լուծարման մասին կազմակերպության բարձրագույն մարմնի որոշումը, կազմակերպության այլ մարմինների ու լուծարման հանձնաժողովի՝ լուծարման գործընթացին վերաբերող որոշումները, դրանք կայացնելուց հետո՝ տասնօրյա ժամկետում, դատարան բողոքարկելու իրավունք ունի կազմակերպության ցանկացած անդամ: Այդ դեպքում դատարանը կարող է իր որոշմամբ կասեցնել վիճարկվող որոշման կատարման ընթացքը՝ մինչև գործի դատական քննության ավարտը:
- 9.16. Կազմակերպության լուծարման պետական գրանցումն իրականացվում է իրավաբանական անձանց լուծարման պետական գրանցման համար օրենքով սահմանված կարգով: